

Riemland streek,

Attie Meintjes,

15 FEBRUARIE 2012

Riemland se Storie.

In ons streek was daar 'n paar ernstige kampeerders, van hulle staan die naam van Joey Muller uit. Die behoefte het ontstaan om op 'n meer ge-organiseerde wyse sinvol saam te kamp. Nadat inligting bymekaar gemaak is, het die vriende besluit om SAWA te nader om by hulle aan te sluit. Dit het op 10 Februarie 2001 gebeur. So het Riemland streek eers as 'n satelliet streek gefunksioneer. Die eerste 6 stigtingslede was: Joey en Koekie Muller, Joey se broer Gerrie en sy vrou Cornelia, Mike en Henrietta Lindeque, Ben en Rita Theron, Willie en Bettie Pelser en Ben en Brenda Pieterse. Van die ou stigtersled is nog net Koekie Muller, Mike en Henrietta Lindeque en Ben en Brenda Pieterse oor.

Binne 'n jaar het die ledetal verdubbel en het die bestuur besluit om aansoek te doen om as volwaardige streek erken te word. By die ledevergadering op 10 April 2002 is aan die lede meegedeel dat die nodige dokumente ingevul en ingehandig is, om as volwaardige streek erken te word. 'n Afstigtingsvergadering is op Vegkop gehou op 21 September 2002 om 11:00 die oggend waar daar 12 van die 16 lede teenwoordig was! Vyf Waens was gaste, hulle was van streek Noord Vrystaat wat daardie tyd die voog van Riemland was. So het Riemland 'n volwaardige streek geword. Die algemene gevoel is dat ons met omsigtigheid lede sal werf. 'n Lid moet die visie en grondbeginsels met gemak kan uitleef. Dit is vandag nog so, en daarom is die lede van ons streek soos een groot familie.

Die karakter van Riemland is dat ons landelik plattelands is. Dit wil sê, dat ons gedagtes en maniertjies saam met die landbou loop. 'n Mooi bui reen, 'n lap pragtige blink mielies laat ons sommer laf van vreugde word. Die lief en leed van die boere en hulle gesinne is na aan die hart se klop. Ouers se invloed op hulle kinders moet nooit onderskat word nie. As ouers kampmense is, dan is die kinders ook gewoon aan die vrye vreugdes van kamp. Om die rede het ons 'n aantal lede verloor met die afsterwe van twee van die ankerpale van ons streek.

Maar laat ek terugkeer na die verhaal. Op die AJV gehou op 1 Augustus 2009 by Frankfort Rivieroord is Joey Muller as voorsitter verkies en Willie Pelser vir penningmeester. Joey het egter baie siek geword en is op 20 Junie 2010 oorlede. Lammie Vos wat die ondervoorsitter was het dadelik as voorsitter ingestaan en op bekwame wyse ons gelei. Willie Pelser is in die hospitaal oorlede op 15 Julie 2010 na 'n klein prosedure wat op sy keel uitgevoer was. Dit was 'n groot skok vir ons almal. Minder as 'n maand na Joey. 'n Klompie van die lede wat na aan Joey was, het bedank en ook van die ander lede. En skielik is daar net 10 lede oor. Ons was in 'n krisis. Cornelia het nie 'n kampplek nie. Maar by die Baptiste kerk is daar 'n terrein waar die kerk saamtrekke hou. Daar was 6 lede teenwoordig en dit was Augustus en winderig en koud. Na deeglike besinning en bespreking by IW van der Merwe se plaas, het ons besluit om nie te ontbind nie. Ons sal weer vra om 'n satelliet van NOVS te word en dan van daar af verder te gaan. Die streek is groot en dit sal werk vra om weer almal bymekaar te kry. Omdat ons vër van mekaar af woon, is kommunikasie soms 'n uitdaging. Landlyne op die platteland is 'n vae herinnering. Selfoon ontvangs soms stotterend. Pos sukkel om die lede te bereik. Tog kan mens soms deur 'n kind of buurman die boodskap deurkry. Almal was

vasberade. Ons prober om gaste te nooi wat ons goed ken om saam te kamp. Van die lede het hulle plaasbure genooi om op 'n Sondag na kerk te kom braai waar ons kamp. Op die manier kon ons weer lede bykry en staan ons nou weer op 21 lede. Dit was werklik 'n spanpoging om ons Rieme weer bymekaar te kry!

Anton Koekemoer van Vaalrivier, nou ook voorsitter van Vaaldriehoek gebied, is nog steeds 'n anker. Hy en Frans Kloppers van Vaalrivier het al 'n paar keer met ons saam gekamp en hulle bemoediging en raad het ons deurgedra. Riemland was hulle gaste by hulle Frankfort hengel naweek. Onder hulle leiding is daar 'n ledevergadering gehou en die besluit geneem om aansoek te doen om weer 'n streek te word. 'n Nuwe bestuur is gekies en die besluit is op die NUB by Bloekompoort voorgestel en aanvaar. **ONS IS NOU WEER 'N VOLWAARDIGE STREEK!**

Verlede jaar, Augustus 2011, het ons 10 jaar oud geword. Dit was 'n fees. Frans Kloppers en Danie van Niekerk wou ter stond oorplasing vra na ons toe! Ons was min, maar die gebraaide skaap is opge-eet. Niemand is toegelaat om te ry voor dit nie alles op was nie. Frans, ons het nog baie plek vir nuwe lede!